

司馬府志

新平知

好學

PDG

西安府志卷第七十九

拾遺志

古蹟

關中記昆明曰神池靈沼堯治水訖停船此地蓋堯時已

有池漢代因而深廣之

已下古蹟
宮闕拾遺

雍錄漢明光宮與長樂相連武帝太初四年起別有明光宮在甘泉宮中亦武帝所起

天香樓偶評黃圖云孝宣帝曉音律嘗於此度曲非也按武帝時從宣曲以南置更衣十二所卽宣曲宮豈因度曲而得名乎

雍錄秦世所鑄特銅人漢武帝建章甘泉所鑄者人旣持盤盤又加杯是爲捧盤金人也三輔故事盤高二丈長

安記曰仙人掌大七圍以銅爲之此建章之銅人也至甘泉宮通天臺上別有承露盤及銅人

述征記長安宮南靈臺有相風鳥或云此鳥遇千里風乃動

漢唐宮闕疏秦始皇令蒙騫伐于闐國得美玉二高七八尺鬼方玉工刻以爲虎虎躍去遣羅侯捕之不得至漢元鼎元年未央宮左右有白虎見命獵者羅致獲一虎卽于闐玉所刻也武帝爲瑞遂建白虎殿

洞冥記元封三年大秦國貢花蹄牛蹄如蓮花善走多力帝使輦銅石以起望仙宮跡在石上皆如花形

事文類聚蜚海獸也漢武作柏梁殿有蜚尾水之精也

卻火災因置其象於上今謂鴟尾非也

述異記漢武宴於未央宮忽聞人語云老臣負自訴不具其形良久見架上老翁長八九寸僂步至前帝問曰舉所訴者何翁仰看屋俯視帝足忽不見帝駭問東方朔朔曰其名蒸兼水木之精也陛下頃來頻修宮室斬伐其居故來訴耳仰看屋而後視足願陛下宮室足於此帝乃息役

翰林雜事鈔漢武帝凌波殿以桂爲柱風來自香

西京雜記積草池中有珊瑚樹高一丈二尺一本三柯上有四百六十二條是南越王趙佗所獻號烽火樹至夜光景欲燃

西京雜記黃帝時西王母獻昭華玉璫漢入關中秦府庫所藏有笛長二尺二寸亦名昭華琯

香譜月支香天漢二年月支國貢長安中大疫使者請燒以辟疫宮中病者瘥長安百里內問其香數月不散

博物志武帝時西海國獻膠五兩餘膠半兩西使自佩後從帝射甘泉宮帝弓弦斷使乃以口濡膠爲水注斷弦兩頭弦遂相著使力士引之終不相離因名續弦膠

西京雜記武帝爲七寶牀雜寶鞍厠寶屏風列寶帳設於桂宮時人謂之四寶

西京雜志長安朝堂卽舊楊興村村門大樹時村人於樹下集議有異僧棧公逐之曰此天子坐處汝等何故居此

及隋文帝卽位便有遷都意

朝野僉載唐太宗養白鵲號曰將軍取鳥常驅至於殿前然後擊殺故名落雁殿上恒令送書從京至東都與魏王仍取報日往返數廻

冊府元龜開元二年六月左拾遺蔡孚獻龍池集請付太常以歌聖德初帝在藩與宋王等居於興慶里時人謂爲五王子宅及景龍末宅內成池湧出汎灩清瑩群臣歌之明皇雜錄開元中三輔大旱元宗密投玉龍子於南內之龍池俄而雲物暴起風雨隨作及幸西蜀車駕次渭水左右侍御於沙中得之上驚喜上旣還京爲小黃門攘竊以遺李輔國置櫃中輔國將敗夜聞櫃中有聲開視之已亡

其所

明皇十七事天寶中興慶池小龍常出游宮垣南溝水中及鑾輿西幸至嘉陵江將乘舟有龍翼舟而進上泫然謂左右曰此吾興慶池中龍也命以酒沃酬之於是龍振甲登天而去

唐鏡記天寶三載五月十五日揚州進水心鏡青瑩耀目背有盤龍勢如生動元宗異之七載秦中大旱詔葉法善於內庫閱此鏡曰鏡龍真龍也上幸凝陰殿詔法善祠鏡龍忽見梁棟及鏡龍口鼻有白氣須臾滿殿遂徧城內甘雨大澍

六帖唐明皇於芙蓉園得白鹿山人王旻曰此漢時鹿也

上命左右周視於角端得銅牌曰宜春苑中白鹿上目之
曰仙客

明皇雜錄上於華清宮新廣一湯制度宏麗安祿山以白
玉爲魚龍鳧雁仍以石梁及石蓮花以獻上命陳於湯中
至解衣將入魚龍鳧雁皆若奮鱗舉翼狀欲飛動上遽命
撤去蓮花今猶存

龍城錄洛人宋單父能種藝凡牡丹變易千種紅白間色
上皇召至驪山植花萬本色彩不同賜金千兩內人呼爲
花師

六帖沉香亭木芍藥朝紅暮黃午碧夜白帝曰此木之妖
也

開天傳信記天寶初劉朝霞獻駕幸溫泉賦詞調倜儻雜
以俳諧其賦首云若夫天寶二年十月後兮臘月前辦有
司之供具命駕幸於溫泉青一隊兮黃一隊熊蹋胸兮豹
拏背珠一團兮繡一團玉鏤珂兮金鏤鞍其後述聖德云
遮莫你古來千帝豈如我今代三郎其自叙云今日是千
年一遇叩頭莫五角六張上覽而竒之命改去五角六張
字奏云臣草此賦若有神助不願改之上曰真窮薄人也
授春宮衛佐

全唐詩話王建華清宮詞云內園分得溫湯水二月中旬
已進瓜唐置溫湯監監丞種瓜蔬隨時貢奉或疑二月非
瓜時答曰驪山溫湯地暖衛宏云始皇種瓜驪山冬實

諸生往視因坑之則溫湯冬已泮矣

丹鉛總錄崔魯華清宮詩曰障掩金雞蓄禍機翠華西拂
蜀雲飛珠簾一閉朝元閣不見人歸見雁歸又曰草遮回
磴絕鳴鑾雲樹深深碧殿寒明月自來還自去更無人倚
玉闌干此詩精練奇麗遠出義山牧之之上

天祿識餘長安故宮闕前有唐肺石宋時尙在其制如佛
寺所擊響石長可八九尺形如垂肺亦有欵識漫不可讀
通鑑唐以宦者使謂之宮市置白望數百人於兩市間

望者白取
人物也

秦記秦始皇起雲明臺窮天下之珍木搜四方之巧工有
二人騰虛緣木揮斤斧於空中子時起工午時已畢謂之

子午臺

已下苑圖拾遺

十洲記秦始皇大苑中多枉死者橫道有鳥銜草覆死人面當時起坐自活始皇遣使齎草問鬼谷先生答云此東海祖洲不死草生瓊田中名養神芝一株可活一人

漢舊儀上林苑中廣長三百里天子春秋獵射苑中取禽無數其中離宮七十所容千乘萬騎

摯虞決疑要注漢武帝鑿昆明池極深悉是灰墨以問東方朔朔曰可試問西域胡後漢時有憶朔言者乃以灰墨問之胡人云天地大劫將盡則劫燒此劫燒之餘

酉陽雜俎昆明池中有戈船樓船各數百艘樓船上建樓櫓戈船上建戈矛四角悉垂幡旄旒葆麾蓋昭灼涯涘又

有豫章船一艘載千人

拾遺記漢武始穿昆靈之池泛翔禽之舟自造歌曲使女伶歌之時日已西傾涼風激水女伶歌聲甚道因賦落葉哀蟬之曲

雍錄西京雜記云武帝修上林苑遠方各獻異木中有千年長生木萬年長生木泊宅編曰徽宗時興畫學命題曰萬年枝上太平雀試者不知問之中官曰萬年枝冬青木也

侯鯖錄漢苑中有柳狀如人號曰人柳一日三起三倒齊民要術漢武帝時上林獻棗上以杖擊未央殿檻呼朔曰叱叱先生來來知此箇裏何物朔曰上林獻棗四十九

枚上曰何以知之朔曰呼朔者上也以杖擊檻兩木林也
來來者棗也叱叱者四十九也

漢武故事帝遊上林見一好樹問東方朔朔曰名善哉帝
陰使人浴其樹後數歲復問朔曰名翟所帝曰朔欺人矣
名與前不同何也朔曰夫大爲馬小爲駒長爲雞小爲雛
大爲牛小爲犢人生爲兒長爲老昔爲善哉長爲翟所長
少死生萬物敗成豈有定哉

曼倩傳武帝時有殺上林鹿者下有司收殺之方朔在旁
曰是固當死者三使陛下以鹿殺人一當死天下聞陛下
重鹿賤人二當死匈奴有急須鹿觸之三當死帝默然赦
之

異志漢武釣昆明池魚綸絕而去夢魚求去其鉤明皇
帝戲於池見魚啣索爲去之復遊於池得珠一雙

賈志元封中數過國獻能言龜東方朔教帝承桂露以飲
之置於通風之臺欲往卜命方朔問焉無不中

拾遺記昭帝元始元年穿淋池廣千步時命水嬉遊宴以
文梓爲船木蘭爲柂隨風輕漾畢景忘歸使宮人歌曰秋
素景兮泛洪波揮纖手兮折菱荷涼風淒淒揚棹歌雲光
開曙月低河萬歲爲樂豈云多

卓異記天授二年臘卿相等詐稱上苑花開請幸則天遣
使宣詔曰明朝遊上苑火急報春知花須連夜發莫待曉
風吹於是凌晨名花瑞草咸發羣臣咸服其異

通鑑景雲元年上御梨園毬場命文武三品以上拋毬及分朋拔河韋巨源唐林環衰老隨絙踣地久之不能興上及皇后妃主臨觀大笑

珍珠船梨園弟子皆居宜春北院時有馬仙期李龜年賀懷智洞知律度中官自蜀回得琵琶以獻其槽以羅沙檀爲之光潤如玉有金縷紅文蹙成雙鳳

松窓雜記元宗自臨淄郡王爲潞州別駕乞歸京師會春暮豪家數輩盛酒饌遊於昆明池上戎服臂鷹直突會前諸輩頗有難色忽一少年持酒船唱令曰宜以門族官品陳備之品酒及於上大聲曰曾祖天子父相王某臨淄郡王也諸少年驚走上連飲三銀船徐乘馬去

紀會要太和九年二月發神策軍千五百人修
如諸司有力要於曲江置亭館者給與閒地七月勅造紫
雲樓綵霞亭於芙蓉園北上好爲詩每誦杜甫哀江頭詩
知天寶以前曲江四岸皆有行宮臺殿思復昇平故事故
爲樓殿以壯之

通鑑初蕭嵩家廟臨曲江元宗以娛遊之地非神靈所宅
命徙之楊炎爲相立廟復值其地盧杞因言嵩廟地有王
氣故元宗徙之炎有異志故取以建廟貶崖州司馬

唐統紀穆宗有事於南郊將謁太清宮長安縣主簿鄭剪
主役見白衣老人云此下有井正值皇帝過路汝速實之
剪驚顧之際已失老人所在護軍中尉劉宏規奏之帝命

韋處厚撰記柳公權書之名聖瑞感應紀

史記汲鄭傳贊下邳翟公爲廷尉賓客闐門及廢門外可
設雀羅翟公復爲廷尉賓客欲往翟公乃署其門曰一死
一生乃知交情一貧一富乃知交態一貴一賤情態乃見
已下第宅拾遺

隋唐嘉話京城諸州邸貞觀間所造至開元初李尚書悉
賣出居人以錢入官

教坊記右教坊在光宅坊左教坊在延政坊右多善歌左
多工舞

畫墁錄唐京省入伏假三日一開印公卿近郭皆有園池
以至契杜數十里間泉石占勝布滿川陸至今基地貴在